

藏書

第十七冊

(明)李贄著

藏書

第
卷五七至卷五九(賊臣傳)
冊

中華書局

藏書卷五十七賊臣傳

一 盜賊

劉盆子等赤眉賊

劉盆子者。城陽景王章之後也。時琅邪人樊崇起兵於莒。衆百餘人。自號三老。是時青徐大飢。寇賊蜂起。羣盜以崇勇猛。皆附之。一歲間至萬餘人。崇同郡人逢安。東海人徐宣等。各起兵合數萬人。復引從崇。共擊王莽探湯侯田況。大破之。遂北入青州。王莽遣廉丹。王匡擊之。崇等欲戰。恐其衆與莽兵亂。乃皆朱其眉以相識別。由

是號曰赤眉。赤眉遂大破丹、匡軍，殺萬餘人。廉丹戰死。王匡走。赤眉遂掠楚、沛、汝南、潁川，入陳留，攻拔魯城，轉至濮陽。會更始都洛陽，遣使降崇。崇等聞漢室復興，卽隨使者至洛陽，見更始。更始皆封爲列侯。然崇等雖封，而實未有國邑。乃復亡歸營，將其衆入潁川，而自分爲二部。更始三年，至弘農。衆遂大集，乃分萬人爲一營，凡三十營。營置三老，從事各一人，又相與求劉氏共尊立之。六月，立盆子爲帝，攻東都門，入長安城。更始降，遂大掠城中，收載珍寶，大縱火燒宮室，復引而西，過祠南郊。車甲兵馬最爲猛盛。衆號百萬，入安定，北至陽城，逢大

雪坑谷皆滿。士多凍死。乃復還。發掘諸陵。取其寶貨。汗辱呂后屍。凡賊所發。有玉匣殮者。率皆如生。故赤眉多行姪穢焉。九月。赤眉復入長安。時三輔大飢。人相食。城郭皆虛。白骨蔽野。遺人往往聚爲營堡。各堅守不下。赤眉虜掠無所得。十二月。復引而東歸。衆尙二十餘萬。隨道復散。光武乃遣破姦將軍侯進等屯新安。建威大將軍耿弇等屯宜陽。分爲二道。以要其還路。敕諸將曰。賊若東走。可引宜陽兵會新安。賊若南走。可引新安兵會宜陽。赤眉遂出關南向。征西大將軍馮異破之於崤底。帝聞。乃自將幸宜陽。盛兵以邀其走路。赤眉忽遇大軍。

驚震不知所爲。乃乞降。曰。盆子將百萬衆降。陛下何以待之。帝曰。待汝以不死耳。樊崇乃將盆子三十餘人肉袒降。上所得傳國璽綬。更始七尺寶劍。及玉璧各一。積兵甲宜陽城西。與熊耳山齊。帝令縣廚賜食。明日。大陳兵臨洛水。令盆子君臣列而觀之。謂盆子等曰。諸卿大爲無道。所過皆夷滅老弱。溺社稷。汙井竈。然猶有三善。攻破城邑。令故妻婦無所改易。是一善也。立君能用宗室。是二善也。餘賊立君。迫急皆持其首降。諸卿獨完全以付朕。是三善也。乃令各與妻子居洛陽。賜宅人一區。田二頃。而憐盆子。厚賞賜之。以爲趙王郎中。後病失明。

賜滎陽均輸官地。使食其稅終身。

李卓吾曰。漢祚之延長。子孫之永賴也。宜哉。創守者斷斷乎當以漢爲法矣。

破六韓拔陵

後魏政亂。沃野鎮民破六韓拔陵聚衆反。諸鎮華夷之民皆響應。拔陵遣別帥衛可孤攻懷朔鎮。時鎮將楊鈞擢賀拔度拔爲統軍。并其三子允勝、岳爲軍主以拒之。魏使李崇持節北討。撫軍崔暹、鎮軍廣安王深皆受崇節度。自拔陵之反。二夏幽涼寇盜烽起。秦州亦推其黨。莫折念生爲天子。魏又遣崔延伯、蕭寶寅帥諸將討念

生時崔暹違李崇節度。與破六韓拔陵戰于白道。大敗。單騎走還。拔陵并力攻崇。崇力戰不能禦。遂引還平城。賴賀拔度拔父子糾合鄉里豪傑。共襲衛可孤。殺之。六月。拔陵圍廣安王深於五原。賀拔勝募二百人。開東門出戰。斬首百餘級。賊稍退。參軍于謹言于王曰。今寇盜烽起。未易專用武力勝也。謹請奉大王威命。諭以禍福。庶幾稍可離之。謹兼通諸國語。乃單騎詣叛胡營。見其酋長。開示恩信。於是西部鐵勒酋長也列河等。將三萬餘戶南詣深降。深欲引兵至折敷嶺迎之。謹曰。拔陵兵勢甚盛。聞也列河等來降。必引兵邀之。若先據險要。未

易敵也。不若以七列河餌之。而伏兵以待之。拔陵果引兵邀擊七列河。盡俘其衆。伏兵發。拔陵大敗。復得七列河之衆而還。拔陵南走。渡河以死。是時。蕭寶寅出兵累年。將士疲弊。秦賊擊之。寶寅大敗。關中驚擾。賴雍州刺史楊椿募兵。得七千餘人。帥以拒賊。詔加椿行臺節度。旣而楊椿有疾。求解。乃復以寶寅爲都督。自關以西。皆受節度。椿謂其子昱曰。當今雍州刺史亦無踰寶寅者。但其上佐。朝廷應遣心膂重人。何得任其牒用。且寶寅不藉刺史爲榮。吾觀其得州。喜悅特甚。恐有異心。汝赴京師。當啓二聖。并白宰輔。更遣長史。司馬。防城都督。欲

安關中。須此三人也。昱面啓魏主及太后。皆不聽。九月。秦州城民杜粲殺莫折念生。十月。寶寅果反。自稱齊帝。魏復以尙書僕射長孫稚爲行臺以討之。寶寅攻馮翊。左丞楊侃謂稚曰。昔魏武與韓遂、馬超據潼關相拒。遂、超之才。非魏武敵也。然而勝負久不決者。扼其險要故也。今賊守禦已固。雖魏武復生。無以施其智勇。不如北取蒲坂。渡河而西。入其腹心。置兵死地。則華州之圍。不戰自解。長安可坐取也。稚曰。子之計則善矣。然今薛修義圍河東。薛鳳賢據安邑。宗正珍孫守虞坂。兵不得進。如何。曰。珍孫行陣一夫。因緣爲將。可爲人使。安能使人。

河東治在蒲坂。西逼河濬。封疆多在郡東。修義驅帥士民。西圍郡城。其父母妻子皆留舊邨。一日聞官軍來至。皆有內顧之心。勢必望風自潰矣。稚乃使其子彥與侃帥騎兵自恆農北渡。據右錐壁。侃聲言停此以待步兵。且以望民情向背。而令送降名者各自還村。俟臺舉三烽。卽舉烽相應。其無應烽者。乃賊黨也。當進擊屠之。以所獲賞軍士。於是邨民轉相告語。雖實未降者。亦詐舉烽。一宿之間。火光遍數百里。賊圍城者。不測其故。各自散歸。修義亦逃還。與鳳賢俱請降。稚克潼關。遂入河東。寶寅出奔。万俟醜奴是時。魏主遇弒。爾朱榮已入洛陽。

矣。八月。賊將葛榮引兵圍鄴。爾朱榮救鄴。擒葛榮至洛。斬於都市。葛榮餘黨韓樓復據幽州。爾朱榮以撫軍將軍賀拔勝爲大都督。鎮中山。樓畏勝威名。不敢南出。榮復使大都督尖山侯淵討韓樓。淵騎卒甚少。或以爲言。榮曰。侯淵臨機設變。是其所長。若搃大衆。未必能用。今以此衆擊此賊。必能取之。淵遂張軍勢。設攻具。親帥數百騎深入樓境。值賊馬步十餘萬。淵潛伏以乘其背。大破之。虜其卒五千餘人。縱之。復許還其馬仗。妙左右皆諫。淵曰。我兵旣少。不可力戰。須爲計以間之。乃可克也。淵遂帥騎夜進。昧旦叩其城門。韓樓果疑降卒爲淵內。

應。遂遁去。追擒之。

奇

二年。万俟卨奴侵擾關中。爾朱榮

遣武衛將軍賀拔岳討之。時赤水蜀賊斷路。岳進擊。破蜀賊於渭北。獲馬二千匹。簡其壯健以充軍士。又稅民馬合萬餘匹。酖奴遣其大行臺尉遲菩薩帥步騎二萬。進至渭北。與岳會。岳引百餘騎隔水與語。稍引而東。至淺水處。岳卽騎馬東出。賊以爲走。棄步兵。輕騎南渡渭。追岳。岳依橫岡。設伏兵以待。賊半渡江東。岳還兵擊之。賊敗走。岳下令。賊下馬者勿殺。賊悉投馬而下。大獲人馬。遂擒菩薩。降其步卒萬餘。酖奴走安定。岳復追賊至于汧渭。停軍牧馬。宣言天時熱。未可行師。俟秋涼乃進。

晡時。密嚴諸軍。相繼俱發。黎明。圍元進大柵。拔之。縱所得俘囚。諸柵聞之。皆降。遂進抵安定城下。醜奴復敗走趣高平。岳復輕騎追及於平涼。賊未成列。直閤侯莫陳崇單騎入賊陣。生擒醜奴。城中執蕭寶寅以降。關中遂定。

黃巢

黃巢。曹州人。世鬻鹽。富于貲。善擊劍騎射。喜養亡命。咸通末。歲飢盜興。王仙芝亂長垣。有衆三千。殘曹、濮二州。先時謠言曰。金色蝦蟆爭努眼。翻却曹州天下反。及仙芝盜起。時議畏之。巢喜亂。卽與羣從八人。募衆數千以

應仙芝轉寇河南十五州。衆遂數萬。關以東州縣大抵皆畏賊。賊於是放兵四略。所過焚剽。生人幾盡。官軍追擊賊遺賫布路。士爭取之。率逗撓不前。賊轉入申光。殘隨州。執刺史。據安州。北掠齊魯。入鄆州。殺節度使。陷沂州。及仙芝爲宋威所獲。傳首京師。其衆復推巢爲王。巢自號衝天大將軍。署拜官屬。驅河南山南之民十萬餘。轉掠淮南。時僖宗以幼主臨朝。號令出於臣下。南衙北司。迭相矛盾。以至九流濁亂。小人讒勝。賢豪忌憤。退處草澤。旣一朝有變。天下離心。故巢之起。人士多附之。巢馳檄四方。章奏論列。指目朝政之弊。皆士不逞者之辭。

也。會巢兵在江西者。爲鎮海節度使高駢所破。寇新鄭、郊城、襄城、陽翟者。爲崔安潛逐走。在浙西者。其賊帥多爲節度使裴瓌斬獲。死者甚衆。巢大沮畏。乃詣天平軍乞降。詔授巢右衛將軍。巢度藩鎮不一。未足制己。隨卽叛去。轉寇浙東。執觀察使崔瑋。踰江西。破虔、吉、饒、信等州。因刊山開道七百里。趨建州。遂入閩。圍福州。觀察使棄城走。巢入城焚燒室廬。是時。閩地諸州皆沒。有詔以駢爲諸道行營都統以拒巢。巢復轉陷桂管。進寇廣州。執節度使李迢。自號義軍都統。露表告入關。因詆宦豎亂朝。指諸臣與中人賂遺交構狀。及刺史殖財產。縣令

犯賊等。皆當時極敝。廣明元年。巢遂自桂編大桴。沿湘下衡。永。破潭州。走招討李係。朗州兵十餘萬殲焉。投觜蔽江。進逼江陵。衆號五十萬。十月。巢據荆南。會山南東道節度使劉巨容壁荆門。使沙佗以五百騎釗轡藻韉。望賊陣縱而遁。賊以爲怯。明日賊將乘以戰。而馬識沙佗語。呼之輒奔還。官兵伏于林。賊急追。伏發。大敗之。巢懼。度江東走。或勸巨容追賊。答曰。國家多負人。事平則得罪。因止不追。故巢得復整其衆。攻鄂州。入之。轉掠江西。再入饒。信。杭州。攻臨安。還殘宣歙等十五州。復以計破殺駢將。而陷睦。婺。二州。又取宣州。濟采石。侵揚州。當